

**ISPOVIJESTI
GRAĐANA BOSNE I HERCEGOVINE
O LIJEČENJU
I
KORIŠTENJU
ULJA KANABISA**



Naša priča vezana za Multipli mijelom (karcinom plazma stanica krvi, dg: Myeloma multiplex IgG, kappa SC III A, ISS II) počela je 2018. godine, iznenada, podmuklo, sa znakovima i najavom koje nismo pravilno razumjeli kao što biva u većini slučajeva. Nastavila se kroz 2020. i 2021. godinu, nakon uspostavljanja konačne dijagnoze kod D., četiri ciklusa kemoterapije i dvije (dubl) transplantacije matičnih ćelija, provedene u 2019. godini, u razdoblju od 6 mjeseci. D. je 1967. godište, a prije bolesti bio izrazito fizički aktivan, društven i komunikativan, nije ga držalo mjesto. Rekreativno se bavio nogometom, ribolovom, te rado igrao bilijar. Podmukli Mijelom je od postavljanja dijagnoze, krajem 2018. godine, blokirao njegovu aktivnost, nametnuo bolove, neraspoloženje, nervozu i strah. Međutim, zahvalni smo Bogu na pruženoj šansi i nastavku života, tako da se ne želimo osvrnati na teške trenutke i idemo dalje. Kroz kompletno vrijeme liječenja nastojali smo da maksimalno podižemo i održimo imunitet na zadovoljavajućem nivou. D. je na terapiji održavanja lijekom već gotovo dvije godine, ali nalazi krvi i urina su se postepeno, ali znatno pogoršali. U urinu se pojavio protein, a u serumu su neprekidno rasli parametri koji su ukazivali na aktiviranje bolesti. Nastupila je panika, znajući da se može ponoviti teški put borbe za život, koji je D. prošao i teško preživio. Stoga smo se počeli raspitivati na društvenim mrežama i grupama koje su formirane radi razmjene iskustava oboljelih. Došli smo do informacije da može pomoći ulje kanabisa, samo THC, koji sadrži značajnu razinu kanabinoida. Odmah smo krenuli u akciju! Međutim, budući da kanabis u Bosni i Hercegovini nije legaliziran, kontakti i komunikacija na tu temu je poprilično diskretna, jer ljudi se plaše, pogotovo oboljeli. Teško je i pomisliti koliko bi doprinijeli njihovom ionako teškom fizičkom i psihičkom stanju, kao i stanju njihovih porodica problemi vezani za krivično djelo opijatima, čime se kod nas smatra ulje kanabisa. Također, nametnulo se pitanje kako da budemo sigurni da kupujemo pravu stvar, odnosno da uzimamo ko zna šta, što će ko zna kako uticati na organizam, a što ćemo pri tome i skupo platiti. Kako doći do pravog dobavljača? Kako transportovati? Započeli smo korištenje ulja. Nakon otprilike 45 dana redovnog uzimanja prije spavanja, koje na D. djeluje umirujuće i pomaže kvalitetnijem spavanju, detaljne pretrage krvi i urina na Odjelu hematologije pokazale su ne samo da je zaustavljen zabrinjavajući rast parametara koji ukazuju na vraćanje bolesti, nego su ti parametri smanjeni. Uslijedilo je naše oduševljenje, koje je ponovo potvrđeno kontrolnim nalazima iz juna 2022. godine, kada poslije dužeg vremena u urinu nije bilo proteina. Znatno je smanjeno i grčenje mišića i trnjenje stopala, koje su posljedica uzimanja terapije istovremeno veoma agresivne prema organizmu. Način života smo potpuno uskladili potrebama D. opstanka, pripremanja organizma na podnošenje težine liječenja, kao i oporavka. Molimo vas da uložite maksimalne napore da u svojoj zemlji pomognete svakom živom biću koje se bori za život i opstanak. Poručujemo svima koji u ovom smislu nemaju empatiju: "Ne lomite mi bagrenje, bez njih će me vjetrovi oduvati..." A mi ćemo se do legalizacije kanabisa i dalje morati snalaziti na crnom tržištu...



“

Želim da podijelim iskustvo prilikom korištenja kanabisa. Imam 52 godine. Prošle godine u augustu mi je dijagnosticiran zloćudni, agresivni karcinom dojke. Cijeli moj svijet se srušio. Ali, odmah sam znala da ću, uz ono što ljekari propišu, koristiti i kanabis, obzirom da sam čula brojna pozitivna iskustva. Ali, gdje nabaviti u BiH kad je ilegalno? Uspjela sam da dođem do pravog ulja kanabisa, kao i savjeta o korištenju. Svom doktoru nisam pominjala da planiram koristiti, jer nisam znala kako će reagovati. Uporedo s početkom kemoterapija (12 sedmičnih ciklusa), sam počela koristiti i ulje. Opće poznato je da kemoterapije izazivaju povraćanje, gubitak apetita, slabost, opadanje kose. Niti jednom nisam povratila, apetit bio nikad bolji. Tumor koji je bio veličine 3 cm se smanjio na 2 cm. Izmjenjujući iskustva s drugim pacijentima koji nisu koristili kanabis, ja to sve pripisujem korištenju istog. Nakon operacije dojke sam nastavila s korištenjem minimalne doze koja se smatra dozom za održavanje i namjeravam koristiti još dugo ako Bog da. Bilo bi puno lakše da mi je ulje kanabisa propisao doktor i dao dodatne smjerice, da se ne moram kriti i osjećati kao kriminalac kada isto nabavljam, a nabavljam za zdravlje.

”

“

Poštovani, ja sam mama dječaka oboljelog od rijetkog i teškog oblika epilepsije, Dravet sy. On ima sada 17 godina, od malena ima česte i teške epileptične napade. Nikakva medikamentozna terapija nije dala efekta. Prije nekih otprilike 4 godine došla sam do ulja kanabisa i počela davati. Napadi su se dosta promijenili, bili su rjeđi i u blažem obliku. On je bio dosta mirniji, razgovjetnije je pričao, držao pažnju duže nego inače. Ulje smo nabavljali ilegalno. Do određenog momenta smo mogli da osiguramo dozu potrebnu za A. ali onda je to prestalo, i zbog financija i zbog straha jer je sama nabavka ilegalna. Čvrsto tvrdim da je mom djetetu bilo puno lakše dok je koristio ulje! Ne koristi već duže vrijeme i jako je loše. Kao njegova mama sve bih dala što je u mojoj mogućnosti da se to napokon legalizuje. Da nam bude dostupno kao lijek. Nadam se da ćete doprinijeti rješenju.

”

“

Moja mama je danas završila sa prvim ciklusom kemoterapija i zračenja. Doktorica je bila zatečena da je mama uopće uspjela izdržati 5 kemoterapija i svakodnevna zračenja simultano. Prošli petak joj je rekla da svima nalazi u kemoterapiji budu lošiji, samo su njoj bolji! Imamo još tri unutarnja zračenja koja idu direktno na tumor. Danas je prvi put pogledala ginekološki i rekla - Ovo je savršeno! I ona i kolegica su bile šokirane toliko pozitivnim rezultatima! Od tumora koji joj je pritiskao mjehur do nečega što je kao mali čvorić za kojeg vjeruju da će se istopiti sa ova tri zračenja. Sve ovo u samo mjesec i po' dana. Mi smo presretne. Ulje koristimo sve vrijeme, vjerujem da je ulje pomoglo da ovu maltene neizdrživu agresivnu terapiju podnese.

”



Pročitala sam u medijima vaš poziv da pišemo svoja iskustva vezano za ulje kanabisa, te sam vam odlučila pisati. Naše najmlađa djevojčica M. (5 g) ima teški oblik epilepsije (farmakorezistentna epilepsija) niti jedan antiepileptik, a probali smo 14 kombinacija nije prekinuo epileptične napade. Bili smo i u Njemačkoj i u Turskoj, ali niti jedan lijek koji su tamošnji stručnjaci dali našoj djevojčici nije imao učinka, čak je od nekih lijekova imala strašne nuspojave od kojih je bila i životno ugrožena. Ja i suprug nismo mogli odustati, samo gledati kako naše voljeno dijete pati i kroz dan doživljava na stotine epileptičnih napada. Doslovno je ostajala bez daha od siline napada. Istraživali smo, uporno tražili lijek, rješenje kojim bi našu kćerku oslobodili barem dijela tih napada, te joj malo olakšali. I našli smo spas - kanabis ulje. Naše se dijete doslovno probudilo, oživilo uzimajući te kapljice ulja! Smanjili su se epileptični napadi, vratio se osmijeh. Preko više ruku prijeđe to ulje, naš spas, dok dođe do nas. Ne mogu vam opisati kolike su to muke dok dođemo do ulja. Troškovi pa onda stalne brige, hoćemo li imati dovoljno. Preteško je, zaista. Pišem ovo u nadi da ćete uspjeti da se izborite za legalizaciju kanabisa u medicinske svrhe i tako nama očajnim roditeljima olakšati i pomoći. Pomozite nam, ne dopustite da se ugasi ovaj tračak nade u bolje sutra našeg teško bolesnog djeteta.



Poštovani, ja imam 34 godine i od toga zadnje 4 se borim sa karcinomom kože, melanom. Za bolest sam saznao 01.11. 2018 godine za svoj rođendan, te od tada imao 3 operacije. Dva ciljana zračenja na mozgu i GAMMA- KNIFE također na mozgu. Koristio sam ukupno 3 vrste imunoterapije koju sam morao na početku kupovati po ogromnim cijenama dok nisam došao na red da dobijem besplatno preko Fonda solidarnosti. Prije 18 mjeseci sam prešao u Tursku na kontrole gdje idem svako 6 mjeseci. Zbog antiepileptika koji su mi uvedeni bez neke velike pomoći ima osam velike komplikacije. Kanabisovo ulje je bilo to koje mi je davalo dovoljno sna da bi organizam funkcionirao. Ono mi je smanjivalo bolove, gdje bi mi ostale tablete uništavale jetru, te samim tim mi omogućilo da nastavim da radim i pomažem mamu financijski jer je otac nažalost preminuo poslije prve godine moje bolesti. Možda ne liječi potpuno bolest, ali je OGROMNA pomoć, da funkcioniramo, jedemo, budemo ljudi. Kanabisovo ulje sam uzimao sa mnogo strana, i to ne samo sebi za svoju bolest nego i za mnogo drugih ljudi sa raznim problemima. I moram reći da je veliki postotak njih imalo izvrsne rezultate.



“

Kao neko 4 godine ima MS (multipla skleroza) podijelio bih svoje iskustvo sa uljem kanabisa. Prije svega moram reći da, kao i svi iz BiH, ulje nabavljam ilegalno, uz razne rizike, što zakonske, što financijske prirode. Ulje uopće nije jeftino i mnogi oboljeli ga ne mogu priuštiti, što im uveliko otežava borbu sa ovom opakim boleštim i šansu za život. Pratim trud onih koji se zalažu za legalizaciju i dugujem jedno veliko hvala na tom putu. Kanabis mi uveliko olakšava život i svakodnevne obaveze, umiruje me, poboljšava motoriku i rad mozga. Uzimanje kanabisa ne samo da mi poboljšava kvalitetu života, već uveliko olakšava sve to i mojim ukućanima. Nadam se da ću dočekati da legalno nabavim kanabis! Svako dobro...

”

“

Multipla skleroza mi je dijagnosticirana prije 4 godine. Prve tri godine sam koristila kortikosteroide koji su držali moju bolest pod kontrolom, ali vremenom oni su prestali da djeluju. Prošle godine je došlo do pogoršanja moje bolesti kada sam bila u jako lošem stanju i tada sam se odlučila na korištenje kanabisovog ulja. Prije korištenja kanabisovog ulja imala sam jake glavobolje koje su trajale po par dana, imala sam problema sa snom i slab apetit. Sve ove simptome sam uspjela popraviti uz pomoć kanabisovog ulja. Glavobolje su jako rijetke, san dobar, apetit još bolji. Prošle godine kada je došlo do pogoršanja moje bolesti slabije sam se mogla kretati, ali uz pomoć ulja - ja se osjećam bolje. Želja nas bolesnih koji se liječimo kanabisom je da se što prije uz pomoć vas legalizuje i omogući lakša nabavka ovoga lijeka. KANABIS JE LIJEK!

”

“

Lijep pozdrav. Naime, ja bolujem od Parkinsonove bolesti i unazad nekoliko godina koristim CBD 30% smolu kao dio svoje svakodnevne terapije. Bez toga, ja bih sada bila u jako lošijem stanju i moja svakodnevica bi bila u velikoj mjeri lošija. Pastu nabavljam na sve moguće načine, iz inostranstva, i svaki mjesec je to pod velikim znakom pitanja, straha jer je teško naći transport. Nadam se da će se i u Bosni i Hercegovini legalizirati upotreba istog, kako bi se svim bolesnicima, a i meni samoj, olakšala svakodnevica. Veliki broj bolesnih bi kanabis i doveo do izlječenja, što farmacija trenutno ne može pružiti sa svojim lijekovima u nekim slučajevima, prema brojnim iskustvima.

”

“

Ja sam došla do otprilike četrdesetog mililitra ulja. Jedan vikend sam ove zime provela sa porodicom na planini. Sa sinom sa se bezbroj puta popela i spustila niz stazu. Na nogama sam provodila po šest sati! Bolovi su bili prisutni, ali zaista mizerni. Spazma nema, tek poneki damar! Idem do šezdesetog ml i nadam se normalnom životu. Ne mogu da vjerujem da sam uspjela. Mislila sam da ta bol nema kraja - ali ima!

”

“

Javljam se u ime svoje svekrve koja ima multiplu sklerozu. Prošle godine smo tek saznali za dijagnozu, nakon što je doživjela dva moždana udara. Za manje od godinu dana ona je bila primorana da se kreće u kolicima. Lezije su joj zahvatile desnu stranu mozga i kičmu. Dobila je preporuku od neurologa da koristi ulje kanabisa, što je provjerljivo, ali nažalost, nismo uspjeli ga nabaviti. Legalizacija bi nam omogućila nabavljanje!

”

“

Jedna sam od mnogih kojima je kanabis pomogao. CT nalaz mi nije bio 100% čist... Uskoro skoro će dvije godine kako uzimam ulje, i sa svojih 60 godina, mislim da dobro izgledam i što je najvažnije funkcioniram. Oni koji su pomogli i koji pomažu (vezno za legalizaciju) su nam svjetlo na kraju tunela! Bolje se osjećam, nemam više bolove. Vjerujem se da će biti još bolje.

”

“

Nakon što sam Pronison ostavila i samo koristila kanabis. Tumor i bolovi su se smanjili, skoro u potpunosti. Bolje spavam, trnjenje se povlači, veći dio dana sam funkcionalna, dok prije sam bila samo do sat vremena. Tako da, odlučila sam nastaviti koristiti ulje.

”

“

Loše stanice su mi nestale korištenjem samo ulja. Imam nalaz, Papa test mi je pokazao sad samo nespecifičnu upalu...

”

“

Bolujem od epilepsije i do sada su mi dva doktora rekla da bi mi kanabisovo ulje pomoglo u liječenju. Kada bih uvela kanabisovo ulje mogla bih prestati koristiti Depakine Chrono tablete što mi je kao mladoj ženskoj osobi iznimno bitno, obzirom da tokom perioda uzimanja tih tableta ne smijem zatrudnjati. Do sada se nisam usudila tražiti kanabisovo ulje na crnom tržištu, ali čim bi bilo legalizirano, odmah bih počela sa korištenjem, jer mi je potrebno!

”

“

Prijateljica je imala karcinom dojke. Saznanje užasno! Kemoterapija i sve što ide uz to je samo po sebi stresno. Odlučila je uzimati ulje kanabisa. Nabavljeno je ilegalno, iako joj služi kao lijek, a uvijek je postojao strah, šta ako bude uzeto tokom liječenja... Danas se liječi od posljedica terapije medikamentima i danas uzima pripravak koji ima ulje kanabisa. Ja sam za legalizaciju!!!

”

“

U nastavku šaljem naše iskustvo sa uljem od kanabisa... Kada smo saznali da otac boluje od rijetkog oblika malignog karcinoma kostiju, te da mu je isti zahvatio predio torakalne kičme, tražili smo pored konvencionalne medicine i alternativni način ublažavanja njegovih svakodnevnih bolova izrazito jakog intenziteta. Mnogo smo preporuka dobili za ulje kanabisa. Već nakon par korištenja bolovi su prestali, a on je nakon operacije nastavio svoj život živjeti isto kao ranije, bez bolova i uz višesatni san koji je ranije bio nemoguć. Pridružujem se ovoj inicijativi, znam da mnogi pacijenti koriste u medicinske svrhe kanabis, npr. prilikom kemoterapije koje su izuzetno teške. Definitivno je potrebno legalizirati i omogućiti ljudima to kao lijek.

”

“

Bolujem od multiple skleroze, liječio sam se i liječim uljem kanabisa, imam jako dobre rezultate! Građani kantona u kojem živim su za legalizaciju ulja kanabisa u medicinske svrhe. I mi smo u ovoj borbi!

”

“

Mojoj je mami prošle godine dijagnosticiran karcinom grlića maternice, neoperabilan. Kemoterapija i zračenje su bili propisana terapija. Onako, uplašene, jedino što mi je imalo smisla jeste da uz terapiju pokušamo i sa uljem. Moj kolega i prijatelj, nesebično je sa mnom podijelio svoje znanje, razgovarao

ISPOVIJESTI GRAĐANA O LIJEČENJU I KORIŠTENJU ULJA KANABISA

sa mojom mamom i uputio je u daljnji proces. Ulje smo jedva nabavili iz Slovenije. To što je ilegalno mi je u tom trenutku bilo najmanje važno. Doktorici smo rekli da će mama uz terapiju koristiti ulje. Nije rekla ništa na to. Ono što se dešava je sljedeće: Pred svaku kemoterapiju pacijent je dužan dostaviti nalaz krvne slike, u odnosu na parametre, doktor procjenjuje smijete li primiti kemoterapiju. Moja je mama primila 6 ciklusa kemoterapije, krvna slika je vjerovali ili ne, bila znatno bolja! Njen apetit je bio bolji (samim tim nije gubila na težini i snazi), nije bilo povraćanja. Kroz kemoterapiju koja po pravilu ruši organizam je prošla iznenađujuće lako. Nakon tog ciklusa došlo je na red unutarnje značenje. Njen tumor koji je prvobitno bio toliko velik da joj je pritiskao mjehur, na prvom unutarnjem zračenju je izgledao kao zrno graška. Na dodir instrumentom, potpuno se izmrvio. Dakle, ne osporavam terapiju koja je bila propisana, dapače, ponovili bi sve isto, ali samo i isključivo uz kanabisovo ulje. Moja mama tvrdi da je upravo ulje održalo i izdržalo terapiju koju je prošla. Ulje je koristila prije početka, tokom i nakon terapije.

”

“

Mom djedu je dijagnosticiran rak sa metastazama. On živi i liječi se u Njemačkoj. Mislim da je suvišno govoriti da smo odmah naručili ulje. Također uz kemoterapiju i zračenje. Na posljednjem snimanju, metastaze su bile znatno manje, a žarišta nije bilo. Obzirom da govorimo o čovjeku starije životne dobi, koji uz sve dijagnoze uz pomoć ulja funkcionira i više nego dobro, za mene je ovo još jedna potvrda sredstva kojim ću liječiti sebe i svoje najmilije!

”

“

Drago mi je da Bosni postoji ova inicijativa i sretna sam da podijelim svoje iskustvo. Ja živim i radim u NY-u i imam problema sa hroničnim migrenama. Posjetila sam brojne neurologe koji su mi propisivali najjače lijekove (triptane), ubrizgavali botox, ali ništa nije funkcioniralo. Čak sam bila i na keto načinu ishrane 6 mjeseci, ali i dalje ništa. Prije 4 godine mi je prijatelj preporučio kanabisovo ulje, koje je jako pomoglo njegovoj majci sa reumatoidnim artritismom. Preporodila sam se, konačno sam počela da spavam normalno i migrene su prošle. Danas ulje koristim pro-aktivno 1-2 sedmično bez ikakvih problema. Nadam se da će vam ovo, još jedno iskustvo, pomoći u borbi za legalizaciju.

”